



**Uunga siunnersuut: Inatsisartut Naalakkersuisullu pillugit Inatsisartut inatsisaata
allanngortinneqarneranik Inatsisartut inatsisaat, nr. xx, uu. qqqq 2020-meersoq**

(Inatsisartut Siulittaasoqarfiat)

(Siullermeerneqarnera)

Politikerit akornganni §37 aqqutigalugu apeqquteqaateqartarneq siunertaqarluarnersoq siornatigut oqallissisaasarsimavoq. Imatut oqarluaannarta; apeqqutit ilai allanut sanilliullugit naleqqunnerusarput, ilaalu assigiinngitsunik peqquteqarlutik akineqarsinnaasanngillat.

Taamaammallu akissuteqartarnissamut pisussaasarneq ilaatigut malittarisanit ataasiakkaat minillugit piumasaaqatasut ersarissarneqarumammata paasillaarsinnaavarput. Piffitsinnimi sipaarfiusuni aningaasartuutit pisariaqarluinnartuunngitsut millisaavigisariaqarpagut, taamaalinikkullu apeqquteqaatit ilaat soq akineqarsinnaannginneranut tungavissaqarluarnerulerpugut.

2015-imi Inatsisartut siulittaasuata nalunaarutigisimavaa Namminersorlutik Oqartussat agguaqatigiissillugu apeqqutit ataatsip akinissaanut akunnerit 12,5-it atortarsimagaat, qaavatigullu nutserneqarnissaanut 722 koruunit atorineqartarsimasut. Kisitsipallakkaannilu ukiuni tulleriinni aningaasarpasuit allaffissornermut atorineqartarsimapput. Aningaasat tamatta akiliutigisimasagut. Inatsisit tungavigalugit sinaakkutissat iluanni, ulluinnarni amerlanerit atussaasumik inuuneqarnissaat qulakkeerusullugu aningaasat atugarissaarnermut atorusunneruagut, soorlu innarluutillit sullinneqarnerannut, Meeqquerivitsialammut aammalu siusissukkut suliniutinut. Assersuutitut taaneqartut aningaasartuutitut killissaritinneqartut allamiit isigineqarnissaa anguniarlugu ilanngussimavakka. Inatsisartunimi ilaasortat apeqqutit ilaat nammineerlutik internet-ikkut misissorsinnaagaluarpaat. Inuunnaat aamma takusinnaasaattut Naalakkersuisut nittartagaanni aammalu sullissivik.gl-imi ilisimasarpasuit paasissutissarpasullu iluaqutaalluarsinnaasut nassaassaapput. Taamaammallu politikerit inooqataasutut pisussaaneermik misigisimalluta akisussaaffeqarlutalu ileqqorissaarnissamut pisussaataavugut. Isumaqaanngilagummi tassuunakkut tamat oqartussaaqataaernerat innarlerneqassasoq. Isumaqaannarpugut Naalakkersuisunut apeqquteqaannginnitsinni, tamatta nammineerluta paasissutissanik ujaarlernissamut pikkorinnerulertariaqartugut. Apeqquteqaateqarsinnaanermulli periarfissaq suli tapersorsorparput, akissuteqaatit inatsisit atuuttut aqqqissuteqqinnissaannut aammalu pisariillisaaneermut inuiaqatigiinnilu naleqarnerulersitsinissamut aqqutissiuussisinnaappata.

Siunnersuutip massuma anguniangarivaa Inatsisartut Suleriaasiata nikingasoqarunnaarnissaa aammalu UKA2019-imi aalajagiunneqarsimasut ilanngullunneqarnissai. Maanna sammisarput naammassiinnagassaannaamat Demokraatinit tapersiivugut. Taamatut oqaaseqarluta siunnersuutip akuerineqarnissaanut innersuupparput.